

**AB-atuisunut aaqqissuussamut, Danmarkimi atuuttumut assingusumik Naalakkersuisut  
aallartitsinissaannik peqquneqarnissaannik Inatsisartut aalajangiiffigisassaattut  
siunnersuut**

(Inatsisartunut ilaasortaq Jens-Frederik Nielsen, Demokraatit)

**Akissuteqaat**

(Ineqarnermut Attaveqaasersuutinullu Naalakkersuisoq)

**Siullermeerneqarnera**

Siunnersuutip siunertaa Naalakkersuisut paasisinnaavaat, tassalu sanaartugassamik isumaqatigiissusiornermi atuisup illersugaalluarnerunissaa.

Taamaakkaluartoq isumaqatigiissusiornermi malittarisassanik siunnersuutigineqartutut piuminarsaanikkut, atuisup tamakkiisumik illersugaanissaa kisimi anguneqarsinnaanngimmat equmaffigineqassaaq.

Isumaqatigiissusiornermi malittarisassat – AP 95-itut aamma ilisimaneqartut\*) – sanaartugassami malittarisassanut piumasaqaatinik piumasaqaatitaqarpoq. Sanatitsisup soqutigisai, entreprenørillu soqutigisai AP 95-mi sammineqarmata ilisimasariaqarpoq. Inuinnaat sanaartornerini AP 95 atorneqassanersoq nammineq aalajangerneqartarpoq. Taamaattumik assersuutigalugu sanaartugassaq pillugu isumaqatigiissusiornermi AP 95 aallaavigineqassasoq illuatungeriit isumaqatigiissuteqarsimatillugit, AP 95 kisimi atuuttarpoq.

Akissarsiutigalugu sanatitsisuunngitsumut AP 95 malissallugu qularnanngitsumik annertugineqarsinnaavoq. Tamanna pillugu annikinnerusumik suliassaqtillugu, assersuutigalugu aserfallatsaaliusoqartussaatillugu nutarsaasoqartussaatilluguluunniit, qularnanngitsumik arlallit allakkatigut isumaqatigiissusiornaveersaartarsimassapput.

AP 95-imut piuminarsaanikkut – AP Atuisumik taasinnaavarput – atuisut ataasiakkaat, sulisartullu suliassamik suliaqartussap suliassaq pillugu allakkatigut isumaqatigiissusiornissaq orniginartinnerulissagaat neriuutigineqarsinnaavoq. Taamaalilluni isumaqatigiissusiusunnginnerinut sanilliullugu, isumaqatigiissusiornikkut illuatungeriit illersugaalluarnerussapput.

Taamaalilluni entreprenørri atuisuulluni sanatitsisumut isumaqatigiissusiortillugu AP Atuisoq aallaavigineqassaaq, AP 95-ilu akissarsiutigalugu sanatitsisunit suli aallaavigineqassalluni.

AP Atuisup suliarineqarnissaani soqutigisaqaqatigiinnut attuumassuteqartunut, matumani atuisunut sinniisut sulisartullu peqatigiiffii attuumassuteqartut ilanngullugit, suleqatigiinnissamik pilersitsoqarsinnaassasoq Naalakkersuisut naatsorsuutigaat.

---

\*) AP 95: Kalaallit Nunaanni sanaartornermi suliassat atortussallu tunniunneqartarneri pillugit ataatsimoortumik piumasaqaatit/ Fælles betingelser for arbejder og leverancer i bygge- og anlægsvirksomhed i Grønland

Aalajangiiffisassatut siunnersuut Inatsisartuni kajumittumik suliassanngorlugu matumuuna tunniuppara.